

Negara miskin terpaksa bayar lebih untuk makanan

PBB jangka krisis diburukkan peperangan Russia-Ukraine

Paris: Pertubuhan Bangsa-Bangsa Bersatu (PBB) menjangkakan negara miskin paling terjejas akibat krisis makanan dunia yang diburukkan lagi oleh perang Ukraine berikutan terpaksa membayar lebih untuk makanan dalam kuantiti lebih kecil.

Nilai import makanan global dijangka mencapai rekod baharu sebanyak AS\$1.8 trilion (RM7.9 bilion) tahun ini apabila konflik Ukraine melonjakkan harga bijirin.

Bagaimanapun kenaikan nilai import itu bukan disebabkan

peningkatan kuantiti makanan, sebaliknya akibat peningkatan harga dan kos pengangkutan lebih tinggi, menurut kenyataan Pertubuhan Makanan dan Pertanian (FAO) PBB yang diterbitkan dalam Food Outlook.

“Membimbangkan, banyak negara rentan membayar lebih tetapi menerima makanan yang kurang,” kata laporan itu.

FAO mengunjurkan bil import makanan global meningkat sebanyak AS\$51 bilion (RM224 bilion) dari 2021, yang mana AS\$49 bilion (RM216 bilion) mencerminkan harga yang lebih tinggi.

Negara kurang maju dijangka menyaksikan penguncupan lima peratus dalam bil import makanan mereka tahun ini.

Bagaimanapun negara Afrika sub-Sahara dan negara membangun yang juga pengimport makanan bersih dijangka mencatat peningkatan dalam jumlah kos, walaupun pengurangan dalam jumlah import, kata agensi itu.

Pengeluaran bijirin utama dunia dijangka merosot pada 2022 buat kali pertama dalam tempoh empat tahun, manakala penggunaan global juga dilihat menurun buat kali pertama dalam tempoh 20 tahun, kata FAO.

Di tengah-tengah harga input yang melambung tinggi, kebimbangan cuaca dan peningkatan ketidakpastian pasaran yang berpunca daripada perang Ukraine, ramalan menunjukkan kemungkinan kekangan pasaran makanan dan bil import makanan mencapai rekod tertinggi baharu, kata ahli ekonomi FAO, Upali Galketi Aratchilage.

“Ini adalah petanda yang membimbangkan daripada perspektif keselamatan makanan, menunjukkan pengimport akan sukar untuk membiayai peningkatan kos antarabangsa, yang berpotensi menandakan berakhirnya daya tahan mereka terhadap harga lebih tinggi,” katanya. AFP

